

教令其長子到華山具述所疾涕泣求救得一曰此疾是殺生  
害命衆冤所爲可修黃籙大齋懺悔宿冤疾冀可愈爾其子以  
此告璞便於所居修黃籙道場七日至第五日璞夢青童二人  
引至一處門闕宏麗有如府署良久天上有黃光如日直照地  
司其門大開卽見魚鼈鳥獸猪羊牛馬奇形異狀者千百頭從  
門中出乘此黃光旋化爲人飛空而去逡巡化盡青童曰此是  
汝之所殺冤魂今天符旣下乘功德力託生爲人汝罪已除瘡  
疾亦愈旬日之間璞乃平復遂入華山禮謝姚尊師看覽雲泉  
戀慕幽境直至日晚得一曰山中無食可以延留長者若住宿  
宵必恐僕從飢餒此有徑路可以還家取一卷仙經擲之展於  
崖上化爲一橋二青龍負之放五色光其明如晝送璞與僕從  
此而去須臾到家明日差人入山致謝已失得一所在璞全家  
修道居於華陽山焉

胡尊師修清齋驗

胡尊師名宗自稱曰欒字郭切居梓州紫極宮嘗沿江入峽道中  
遇神人授真仙之道辯博賅贍文而多能齋醮之事未嘗不冥  
心滌慮以祈感通梓之連帥皆賢相重德幕下盡皆時英碩才  
如周相國李義山畢加敬致禮其志亦泊如也泊解化東蜀顯  
跡涪陵方知其蛇蟬之蛻得道延永爾梓益褒聞間自王法進  
受清齋之訣俗以農蠶所務每歲祈穀必相率而修焉至有白

衣之夫緇服之侶往往冒科禁而葺事者固以爲常矣有郡人  
劉崧慕師之道德請於別地以致齋焉師謂之曰夫嘯僑侶命  
儕友者猶須正席拂筵整邊洗爵恭敬以成禮嚴恪至致事或  
懼其誚讓責其不勤况感降天真禱求福祐豈可陡然而買罪  
乎俗之怠惰有自來矣子可訓勗於衆必精必虔乃可爲爾崧  
承命誓衆潔己率先而撰香花備壇墀師然後往猶丁甯戒誨  
旣昇壇展禮思神之際有黑雲暴起旋飈入座拔其二柱飄其  
竹席投其鎗釜於千步之外而後卒事而融風熙熙祥氣巨野  
師詰所投之物其二柱嘗閣於豕圈之上竹席嘗蔽於產婦之  
室鎗釜嘗爨於衰絰之家其不投者皆物之潔矣師曰器用不  
潔神明惡之况爾之心乎心苟有疵行苟有玷雖百牢陳於席  
九韶奏於庭適足以瀆神明延大禍爾人之修心必使乎言行  
相昭內外坦然明不媿於人幽不慙於鬼吾知其可爾反於是  
者豈言之足徵哉士君子里巷之人聞師之言各革惡趣善  
矣

崔玄亮修黃籙齋驗

崔公玄亮奕葉崇道雖登龍射鵠金印銀章踐鴛鴦之庭列珪  
組之貴參玄趨道之志未嘗怠也寶曆初除湖州刺史二年乙  
巳於紫極宮修黃籙道場有鶴三百六十五隻翔集壇所紫雲  
蓬勃祥風虛徐與之俱自西北而至其一隻朱頂皎白無復玄

道藏輯要

雲笈七籤  
十三

奎

井集六  
八〇八上